

दिनांक 27.08.2025

समय: 18.45 बजे

व केन्द्रीय मंत्रिमंडल पीएम स्वनिधि योजना ने और बेहतर बनावण अर कर्ज री मियाद बधावण री मंजूरी दीनी।

व राज्य मांय मांग रे मुजब खाद री जरूरी पूर्ति तैय करी जा रही है— हाल ताई 8 लाख 23 हजार मीट्रिक टन यूरिया मुहैया करायी ज्यो।

व आर.पी.एस.सी. फर्जी दिव्यांगता प्रमाण पत्र रा बधता मामलां ने ध्यान राखता थकां भर्ती प्रक्रिया मांय मेडिकल जांच रो प्रावधान कीनो।

व गणेश चौथ रो पर्व सिरधा अर भक्तिभाव सागे मणायो जा रह्यो है।

000

केन्द्रीय मंत्रिमंडल पीएम स्ट्रीट वेंडर्स आत्मनिर्भर निधि योजना ने और बेहतर बनावण अर कर्ज री मियाद 31 मार्च, 2030 ताई बधावण री मंजूरी दे दीनी है। बेहतर बणायी ज्यी योजना रो मकसद 50 लाख नुवा लोगां समेत कुल 1 करोड़ 15 लाख जणां ने फायदो देवणो है। इण ऊं गळी —कूचा मांय सामान बेचण वाळां अर वां रा पिरवार वाळां ने आसानी ऊं कर्ज मिल सकेला। ई सागे ई ही योजना रो दायरो कस्बां अर अर्धशहरी हलकां ताई बधायो जा सकेला। पीएम स्वनिधि योजना रा तैत ई साल 30 जुलाई ताई 68 लाख ऊं बत्ता रेहडी—पटरी वाळां करीब 13 हजार करोड़ रुपया रा 96 लाख ऊं बत्ता कर्ज दिया जा चुक्या है। कैबिनेट राष्ट्र मंडल खेल 2030 सारु बोली लगावण रा युवा अर खेल मंत्रालय रा प्रस्ताव ने ई मंजूरी दे दीनी। अ खेल गुजरात रा अहमदाबाद मांय व्हेला। इण मांय 72 देशां रा एथलीट शामिल व्हेला।

000

प्रधानमंत्री नरेंद्र मोदी काल जापान रा दौरा सारु जावेला। वां रो भारत-जापान शिखर सम्मेलन मांय शामिल व्हेवण रो कार्यक्रम है। प्रधानमंत्री रा ई दौरा ने दोन्यू देशां बीचे भागीदारी रा नुवा पन्ना री सरुआत रा तौर ऊं देख्यो जा रह्यो है। फ़िलहाल भारत-जापान बीचे करीब 22 अरब डॉलर रो कारोबार व्हे है। प्रधानमंत्री रा ई दौरा ऊं सेमीकंडक्टर, रक्षा अर सुरक्षा, विज्ञान अर प्रौद्योगिकी अर बुनियादी ढाँचा विकास ऊं जुड़्या हलकां ने बधावो मिलण री आस है।

000

गृह मंत्री अमित शाह कह्यो है के ऑपरेशन सिंदूर अर ऑपरेशन महादेव ऊं आतंकियां ने करडो जवाब मिल्यो है। श्री शाह आज ऑपरेशन महादेव मांय शामिल व्ह्या फौज, जम्मू-कश्मीर पुलिस अर सी.आर.पी.एफ. रा जवानां रा मान करण रे मौके बोल रह्या हा। वे कह्यो के एनआईए री फोरेंसिक प्रयोगशाला तकनीकी तौर ऊं साबित कर दीनो है के ऑपरेशन महादेव रे दौरान मारी ज्याआतंकवादी पहलगाम हमला ऊं जुड़्या हा। गृहमंत्री कह्यो के भारत रा फौजी दुनिया ने बता दीनो के आतंकवादी नी बच सके है।

000

राज्य मांय मांग रे मुजब खाद री पर्याप्त पूर्ति करी जा रही है। कृषि विभाग री ओर ऊं काश्तकारां ने खाद री लगातार पूर्ति तैय करण सारु सगळा जरूरी जतन कर्या जा रह्या है अर यूरिया अर डीएपी री उपलब्धता माथे खास ध्यान दियो जा रह्यो है।

000

वरिष्ठ नागरिक तीर्थ योजना रा तैत आज डूंगरपुर मांय लॉटरी निकाळी ज्यी। जिला कलेक्टर अंकित कुमार सिंह बतायो के हवाई यात्रा सारु 121 अर रेल रे ज़रिए तीरथ माथे जावण वाळा 1 हजार 6 जातरुआं रो चयन करी ज्यो है। वे बतायो के उपलब्ध कोटा रे अलावा वेटिंग लिस्ट ई जारी करी ज्यी है। करौली मांय ई आज तीर्थ यात्रा योजना सारु लॉटरी निकाळी ज्यी।

000

राजस्थान लोक सेवा आयोग-आरपीएससी फर्जी दिव्यांगता प्रमाण पत्र रा मामलां ने ध्यान राखता थकां भर्ती प्रक्रिया मांय मेडिकल जांच रो प्रावधान कीनो है। आर.ए.एस. भर्ती 2023 मांय पहली दफा मेडिकल जांच ई करी जा रही है। ध्यानजोग है के ई पहल ऊं शंका लायक सर्टिफिकेट वाळा केई उम्मीदवार मेडिकल जांच मांय शामिल नी व्हे रह्या है। आयोग सामी ऐड़ा केई मामला आया है, ज्यां मांय उम्मीदवार वां री श्रेणी दिव्यांग ऊं सामान्य करण री अर्जी दीनी। आर.पी.एस.सी. रा अध्यक्ष उत्कल रंजन साहू बतायो के ई कदम ऊं भर्ती प्रक्रिया मांय साफगोई आवेला। ई सागे ई फर्जी सर्टिफिकेट रे पाण दिव्यांग अर दूजी श्रेणियां रो गैर-कानूनी तरीका ऊं फायदो लेवण वाळां माथे ई लगाम लागेला।

000

प्रदेश मांय बेहतरीन काम करण वाळी सहकारी समितियां ने नवाजी जावेला। अंतर्राष्ट्रीय सहकारिता वर्ष अर 'सहकार से समृद्धि' ने कामयाबी सागे लागू करण सारु पैक्स अर लैम्प्स रो बेहतरीन काम रा आधार ऊं मान कर्यो जावेला। सहकारिता विभाग री प्रमुख शासन सचिव मंजू राजपाल बतायो के एनसीडी पोर्टल माथे बतायी ज्यो नम्बरां रे मुजब वां रो चयन कर्यो जावेला।

000

गणेश चौथ आज सिरधा अर भक्तिभाव सागे मनायी जा रही है। संवारे ऊं ई मिन्दरां मांय भक्तां री लेणां निजर आवण लागी। न्यारी-न्यारी ठोड़ां शोभा यात्रावां ई निकाळी जा रही है। घरां अर पाण्डालां मांय गणपति स्थापना करी ज्यी। ई सागे ई दस दिन तांई मणायो जावण वाळो गणेशोत्सव सारु व्हे ग्यो। ई मौके प्रधानमंत्री नरेन्द्र मोदी वां रा संदेश मांय ओ पावन मौको सगळा सारु मंगलकारी व्हेवण अर सगळां री जिन्दगी मांय कोई अड़चन नी आवण री कामना कीनी।

.....

मुख्यमंत्री भजनलाल शर्मा जयपुर रा मोती डूंगरी गणेश मिन्दर मांय विधि-विधान सागे पूजा-अर्चना कर र प्रदेश मांय समृद्धि अर खुशहाली री कामना कीनी। मुख्यमंत्री कह्यो के प्रदेश मांय ई दफा चोखो मेह व्हेवण ऊं राज्य हरियाळो राजस्थान ओड़ी बढ रह्यो है।

.....

सवाईमाधोपुर रा त्रिनैत्र गणेश मेळा मांय ई संवारे ऊं ई जातरु पूगण लाग्या। चूरु रा गणेश मिन्दरां मांय ई दर्शन सारु लम्बी लेणां निजर आयी। डूंगरपुर, कोटपूतली-बहरोड, अजमेर अर हनुमानगढ समेत केई ठोड़ां भक्तां रो उमाव निजर आ रह्यो है। राजसमंद मांय ई गणेश मिन्दरां ने खास तौर ऊं सजायी ज्यो है। म्हाणा खबरनवीस बतायो के वठै अरविंद स्टेडियम मांय आज गणेश उत्सव सारु व्हेयो।

.....

ई दफा गणेश चौथ ऊं पैली ई न्यारा-न्यारा संगठनां री ओर ऊं गणेश जी री मिट्टी अर गोबर ऊं बणी मूर्तियां बैठावण री अपील करीजी। अनंत चौदस रा दिन विधि-विधान सागे गणपति विसर्जन कर्यो जावेला।

000

बालोतरा मांय लूणी नदी री जसोल-बालोतरा रपट माथे एक कार बेकाबू व्हे र पलट जावण ऊं कार मांय सवार आठ लोग नदी मांय बह ग्या। वां मांय ऊं तीन जणां री मौत व्हे ग्यी, जद के दो जणां रो जिला अस्पताल मांय ईलाज कर्यो जा रह्यो है। सिविल डिफेंस अर प्रशासन री टीमां बाकी तीन जणां री तलाश कर रही है। अ सगळा लोग जोधपुर जिला रा नरसिंहपुर गांव ऊं जसोल माता भटियाणी मंदिर जा रह्या हा। दूजी कानी जालौर जिला रा आसाना गांव कने नदी किनारे एक कार अर छह जोड़ी जूता मिल्यां पाछे तुरत तलाशी अभियान चलायी ज्यो। एसडीआरएफ री टीम चार लाशां बरामद कीनी है। चित्तौड़गढ़ जिला रा राशमी मांय एक वैन पुलिया पार करती बगत बनास नदी मांय पड़ ग्यी। हादसा रे कारण

तीन जणां री मौत व्हे गयी। एक जणा री तलाश करी जा रही है, जदके पांच जणां ने हिफाजत सागे निकाळ लिया ज्या। पुलिस रे मुजब हादसा रा शिकार लोग ज़िला रा भूपाल सागर कने कानाखेड़ा गांव रा रेहवासी हा जो भीलवाड़ा ज़िला मांय सवाईभोज मिन्दर रा दर्शन सारू गया हा। वे गूगल मैप री मदद ऊं जा रह्या हा अर बंद पड़ी सोमी-उपरेड़ा पुलिया माथे पूग्या, जठे वे पाणी मांय बह ग्या।

000

राज्य रा कुछ हलकां मांय आवता दो दिन हल्की ऊं मझला दर्जा री अर लंकाऊ हलकां मांय कठे-कठे मझला ऊं भारी दर्जा री बारिश व्हेवण रा आसार है। मौसम महकमा रे मुजब राज्य रा लंकाऊ-ऊगणी हलकां मांय 29 अर 30 अगस्त ऊं बिरखा मांय ओजू बधोतरी री संभावना है। ई दौरान कोटा अर उदयपुर संभाग मांय कठे-कठे भारी बारिश व्हे सके है। ई बीचे आज डूंगरपुर अर भरतपुर मांय दोपहरां पाछे झमाझम मेह बरस्यो। म्हाणा डूंगरपुर खबरनवीस बतायो के इण ऊं केई ठोडां आवण-जावण माथे असर पड़्यो।

.....

राज्य रा घणखर जल स्त्रोतां मांय लगातार पाणी आ रह्यो है। अ भराव बूता रा 82 फीसदी ऊं बत्ता भर ग्या है। छोटा-मोटा 693 बंधां मांय ऊं 335 पूरा अर 231 थोड़ा घणा भर्या है।

000